

1360

筠

谿

集

七

五

五

五

五

五

五

五

五

詳校官庶吉士臣瑚圖禮

侍讀臣孫球覆勘

總校官肅吉士臣倉聖脉

校對官典簿臣郭祚熾

膳錄監生臣楊其梓

欽定四庫全書

筠谿集卷十四

宋 李彌遜 撰

詩六十二首

春雪

繁雲初弄日累靄漸韜霞夜色連空迫春英入望賒白
霓分羽衛青女亂簪珈栩栩思輕蝶飛飛欲盡花瓊瑰
纔瑣屑龍鳳忽交加騁銳邀難駐便輕去莫遮似因風
伯力偏助水官夸闊布漫天陣低成匝地窪升階方浸

潤投隙任欹斜雜遝爭排拶縱橫類攫拏怙陰方洶洶
畏日尚譁譁遇坎寧辭險投荒忽匿瑕誰能問畛域何
處辨隆窞眺遠眸增眩驚深吻盡呀勢包誇海若功蓋
補天媧賦象隨形巧噓枯與物華黏枝拳宿鷺拆竹響
翻鷗逕沒虫書蘚灘平鳥篆沙缺池靜鳬鶩凍草伏麋
麋着柳封腰束停莎老髻丫圓方雜圭壁牝牡失驪駟
砌走馮夷蚌簷垂白帝蛇趨明驚吏愕唱曉誤雞啞表
沴愁交積占豐信有涯平施入穠蒙餘潤到蓬葭穫早

車應秬稌多壘看秬沽帘迎路轟賽鼓集祠撾梁苑曾
延客藍橋正憶家劒歌悲雜缶陶飲樂勝汙更覓劉叉
伴相從詠雪車

劉根道院

仙去久不返遺宮仍倚嵩終疑白雲屋猶隱綠毛翁山
曉水聚樹秋深霜影空它年結廬地千古想真風

天封觀

搖落秋山路烟留寶構昏曾迴翠華步不到紫虛門可

鑑豐碑壯無知老柏尊勒功當日事寂寞更誰論

和少章喜晴

日暮馬行疾峰巒過眼頻雨階長若夜晴谷似逢春風
月起歸恨江天思故人機心渾已盡唯有白頭新

又和少章別

非無山林意去住亦隨緣落日有歸翼亂山猶着鞭風
簷依路濕烟樹著行圓清絕歸時思新詩句句傳

發光林寺

朝發光林寺崎嶇渡復攀
振衣緣翠濕側足下蒼顏
急雨欲平澗斷雲時見山
祇應超勝地行路未嘗難

瓜步阻風作

二首

西風趣秋去何日放船迴
不見澄江練唯聞捲地雷
官遊雙鬢改飄泊寸心灰
落日乾坤裏微吟酒一杯
牢落窮途暮扁舟水四涯
十年長作客萬里得還家
雲散山排仗潮生浪趁衙
殷勤謝風馬爲挂一帆斜

次韻賁遠歸田

四首

歸去田園好春隨人意和竹根晴日卧牛角晚風歌漂
梗空三逕虛舟信一波故人憐寂寞千里問如何

又

歸去田園好饑餐抵萬錢愁從身外散樂向酒中金蠶
出柔桑綠秧齊小麥鮮一廛何所寄華髮繞江天

又

歸去田園好秋還橘柚鄉稻梳縈帶水茅枕束芻簞絕
迹公門步薰心佛土香此生真逆旅無慮可消忘

又

歸去田園好，門羅樹外峰。
地偏羣燕雀，江靜隱魚龍。
愁覓鄰家酒，眠憎近寺鐘。
一春強半雨，誰與問豐凶。

久雨阻遊昭亭有作

浪迹隨方寄，窮途觸事諳。
雨逢春甲子，江滿地東南。
客鬢霜前落，詩情酒外酣。
上方愁獨往，藜杖許同參。

琴溪

竹色千鐘靜，溪光一鑑開。
巖隈宿風雨，人迹老莓苔。
控

鯉定何在騎鯨今不來空餘泉上月與我共徘徊

世傳琴高生釣於溪上其後控鯉仙去李太白酬崔十五詩云相招琴溪飲蓋其常遊之地

秋霜閣

十月水西寺興窮還為留淨坊深閉雨虛閣暗藏秋
盡霜中葉身閑水上鷗知幾傷太白五月念貂裘

太白詩云五月思貂裘謂言秋霜落名閣取此意也

綠竹閣

草木盡改色孤標綠正繁曳雲扶勁節歌石護盤根靜

者宜投迹高人時避喧歲寒松柏共何必在梁園

春日雜詠九首

春到陵陽市人家泊翠微南烹甘入飭北戶煖生衣花
暗昭亭寺魚肥句水磯樂遊須結社倒著接羅歸

又

幽棲足春事晴日若相催屐齒穿沙穩筇鬚礙竹回光
風初轉蕙殘雪欲欺梅自是經過少柴門日日開

又

漸欲拋書卷行藏任轉蓬負暄攜稚子抱熟覓鄰翁接
葉猶妨徑拳芽未着叢主林真好事為我結新紅

又

役役炎涼態悠悠道路賒情懷知老大夢幻閱紛華攪
思雲邊樹供愁雨外花生涯書一束到處即為家

又

憶昨金門侍晨參玉佩聲解纓青瑣闥東載錦官城日
與長安遠春隨上苑生執鞭非所好獨抱戀軒情

又

不作觚稜夢長閑地角身南冠欲從楚西笑敢懷秦鴻
雁猶千里牛羊絕四鄰門羅今可設更恐白頭新

又

懶慢嵇中散寬閑得自怡抱衾長恨晚倒屣不嫌遲網
日蛛絲掛梳烟柳髮垂朝來被花惱浪走習家池

又

二月忽已破一春強半過提壺工喚客布穀巧當歌得

酒先愁盡惜花翻恨多逢辰不爲樂明日復如何

又

軒冕真成寄江山早見招懶從春後覺意別枕邊消竹
色侵書靜松聲落耳遙安心朝霧薄烏鵲莫相撩

天慶道士何丹林作亭竹間方成予名之以秀

野因留小詩

斫竹通圭竇開垣列畫圖乾坤藏小有日月近方壺樹
色雲邊斷山形地外孤時來騁遊目更爲剪繁蕪

寄題徑川劉子先逸軒

古縣溪山裏深軒城郭餘池清從近市朋好亦多車雲
引尋山屐風繙插架書會看迎鶴版不獨愛吾廬

彥術權郡大夫相邀昭亭以病酒不果往得所
示佳句輒次韻呈

五馬行春路松行舊不斜醉眠方夢草遊騎想穿花訪
古千秋暗逃禪百慮賒歸來傳麗句字字敵春華

早入昭亭與同遊散步山中自樵徑至水濱路